



FOTO RALPH FEINER/52BESTEBAUTEN

Ina scrinaria moderna e tuttina famigliara

■ (ls/fmr) A l'ur d'in pitschen aclaun al fund da la Val Bregaglia ha l'architect *Armando Ruinelli* (1954) erigì ina vasta halla da commerzi. La scrinaria Sciuchetti a Spino demussa ch'era construcziuns nunusitadas pon cuntegnair ina tscherta cuntinuitad. Ruinelli è s'orientà a la siluetta da las chasas istoricas ed

ha realisà lur moda da bajegiar en furma moderna. L'architect è enconuschent per respectar ils standards d'in lieu e per mantegnair las furmas simplas dal bajegiar rural. Sur in sochel betunà da l'edifizi s'auza ina construcziun da lain, cuverta dad aissas da lain da pign surpostadas. La graduaziun dal tetg sa re-

ferescha als ierts en furma da terrassa sin la spunda visavi e maina vi a la riva taissa dal flum vischinant.

La Lia grischuna per la protecziun da la patria preschenta 52 bajetgs durant quest onn per far attent a la cultura architectonica dal Grischun – latiers tutga era la scrinaria a Spino.